



Broj: 03/10-50-18-43-3/21
Sarajevo, 09.4.2021.

Istraživanje broj: 329
Vrsta istraživanja: KOMP

**RADNA TIJELA I ORGANIZACIONE JEDINICE
ZA EVROPSKE INTEGRACIJE U PARLAMENTIMA
- ISKUSTVA POJEDINIХ ČLANICA EVROPSKE UNIJE**

Pripremila:
Sena Uzunović

Istraživanje je namijenjeno poslanicima i delegatima, koji mogu postaviti dodatna pitanja, sugestije i komentare na email adresu: istrazivacki.sektor@parlament.ba.

Javnost Bosne i Hercegovine može komentirati radove, ali Istraživački sektor nema mogućnost da odgovara na komentare i diskutira o istraživanju.

Informacije navedene u sadržaju istraživanja važeće su u trenutku pripreme istraživanja i one se ne ažuriraju nakon objave istraživanja.

Istraživanje ne odražava zvaničan stav Parlamentarne skupštine Bosne i Hercegovine (PSBiH).

RADNA TIJELA I ORGANIZACIONE JEDINICE ZA EVROPSKE INTEGRACIJE U PARLAMENTIMA – ISKUSTVA POJEDINIHL ČLANICA EVROPSKE UNIJE

Uvod

U parlamentima **Slovačke, Češke Republike, Latvije, Litvanije, Estonije, Slovenije, Rumunije i Hrvatske**, koje su Evropskoj uniji pristupile 2004., odnosno 2007. i 2013. godine, u periodu prije članstva djelovalo je stalno radno tijelo zaduženo za evropske integracije (komisija za evropske integracije), te sekretarijat ovog radnog tijela kao organizaciona jedinica administracije parlamenta. Osim toga, u pojedinim od navedenih parlamenata djelovala je još jedna organizaciona jedinica zadužena za pitanja evropskih integracija i EU: u Latviji je to bio Informativni centar o Evropskoj uniji, u Rumuniji - Sektor za evropska pitanja, a u Slovačkoj i Češkoj Republici - Parlamentarni institut, dok je u Parlamentu Litvanije Evropski informativni centar bio u sastavu Sekretarijata Komisije za evropska pitanja.

Rad, prema zahtjevu naručioca, sadrži opis radnih tijela i organizacionih jedinica za evropske integracije u parlamentima Slovačke, Češke Republike i Latvije, te kratke informacije o radnim tijelima i organizacionim jedinicama za evropske integracije u parlamentima Rumunije, Litvanije, Estonije, Hrvatske i Slovenije. Prema informacijama kolega, opis poslova ovih organizacionih jedinica u Rumuniji i Litvaniji dostupan je samo na rumunskom, odnosno litvanskom jeziku, u zatvorenom digitalnom arhivu odnosno u formatu pdf.

Slovačka

U periodu pristupanja Evropskoj uniji Parlament Slovačke usvojio je 1996. godine dokument “Glavni zadaci Parlamenta u procesu usklađivanja zakonodavstva Slovačke sa zakonodavstvom EU i uključivanje Sekretarijata Parlamenta u taj process”, a zatim 2000. godine dokument “Ciljevi i glavni zadaci Parlamenta u pripremama za pristupanje Slovačke Evropskoj uniji”. **Sva stalna radna tijela** (komisije) Parlamenta imala su, između ostalog, nadležnost za provjeru usklađenosti prijedloga zakona, iz oblasti koje su spadale u djelokrug radnog tijela, s pravnom stečevinom EU (*acquis*). Osim toga, ove nadležne komisije obavljale su nadzor nad aktivnostima odgovarajućih ministarstava u procesu pristupanja EU.

Tokom pregovaračkog procesa o pristupanju značajna je bila, između ostalih, uloga **Ustavno-pravne komisije**, koja je osnovala svoje *ad hoc* savjetodavne komisije, Komisiju za usklađivanje pravnog sistema Slovačke s pravom EU i Komisiju za usklađivanje zakonodavstva sa zakonodavstvom EU, sastavljene od zastupnika, univerzitetskih stručnjaka, predstavnika nevladinih organizacija, interesnih grupa itd. Navedene *ad hoc* komisije ocjenjivale su rad Vlade u oblasti usklađivanja propisa i davale preporuke u vezi s tim. Također je bila značajna uloga **Komisije za vanjske poslove**, koja se bavila pitanjima evropskih integracija do formiranja Komisije za evropske integracije. U nadležnosti **Komisije za evropske integracije** bilo je praćenje provođenja Sporazuma o pridruživanju, nadzor nad aktivnostima provođenja Nacionalnog programa usvajanja *acquis* EU i praćenje korištenja prepristupnih instrumenata pomoći EU (PHARE, ISPA, SAPARD). Komisija je također bila redovno informirana o pregovaračkim stavovima i napretku u pregovorima o pristupanju.

Ostala radna tijela bila su zadužena za nadzor nad usklađivanjem zakonodavstva iz svoje nadležnosti s *acquis*-em EU. Uz svaki Vladin prijedlog zakona predviđen za usklađivanje sa zakonodavstvom EU obavezno su bile priložene izjava o usklađenosti i tabela usklađenosti, koje su sadržavale analizu prijedloga zakona u vezi s *acquis*-em EU i vremenski raspored usklađivanja. Vlada je jednom godišnje izvještavala Parlament o provođenju Nacionalnog programa usvajanja EU *acquis* i dva puta godišnje o spremnosti Slovačke za članstvo u EU.

Generalni sekretar donio je 2000. godine novi Pravilnik o organizaciji Sekretarijata Parlamenta, prema kojem su za pitanja evropskih integracija bili zaduženi **sekretarijati stalnih radnih tijela** (komisija) i nekoliko sektora u organizacionoj jedinici **Parlamentarni institut**:

- Sektor za zakonodavstvo i usklađivanje propisa (s dva odjela: Odjelom za zakonodavstvo i Odjelom za usklađivanje propisa),
- Sektor za analize i obrazovanje (s dva odjela: Odjelom za društvene i ekonomske analize i Odjelom za analize u oblasti unutrašnje i vanjske politike i evropskih integracija),
- Sektor za parlamentarnu biblioteku (s četiri odjela: Odjelom za bibliotečki sistem, Odjelom za referentne usluge, Odjelom za saradnju s bibliotekama i Odjelom za prevođenje),
- Odjel parlamentarne arhive,
- Odjel za razvojnu pomoć.

Sekretarijati komisija, uključujući sekretarijat Komisije za evropske integracije, obavljali su zadatke potrebne za rad parlamentarnih komisija, kao što su priprema poziva, izrada zapisnika, priprema izvještaja komisije, upravljanje uredom itd. Za provjeru usklađenosti prijedloga zakona s *acquis*-em bio je nadležan **Sektor za zakonodavstvo i usklađivanje propisa** (posebno **Odjel za usklađivanje propisa**) Parlamentarnog instituta .

Zadaci Sektora za zakonodavstvo i usklađivanje propisa bili su (a većinom su i danas), između ostalog:

- priprema prve informacije (informacije u roku od dvadeset sati), koja je predsjedniku Parlamenta služila kao osnova za donošenje odluke da li podneseni prijedlog zakona ispunjava uslove po Zakonu o Poslovniku Parlamenta i Pravilniku o izradi propisa,
 - priprema druge informacije prije drugog čitanja, kao provjere usklađenosti prijedloga zakona sa Ustavom i propisima, a što je služilo kao osnova zastupnicima, posebno izvjestiocu kojeg je imenovala nadležna komisija,
 - pružanje pravne pomoći sekretarima komisija prilikom izrade izvještaja nadležne komisije,
 - praćenje glasanja o izvještaju i amandmanima tokom plenarne sjednice,
 - provjera i redigiranje teksta usvojenog zakona – priprema teksta za objavljivanje u službenim novinama,
 - pružanje savjeta u vezi sa zakonodavstvom zastupnicima i odjelima Sekretarijata Parlamenta.
- Isti Sektor je vodio evidenciju pravnih akata Evropske unije i međunarodnih ugovora kojima je Slovačka pristupila. Sektor je također sarađivao s institucijama EU i Delegacijom EU u Slovačkoj. **Odjel za usklađivanje propisa** u ovom sektoru bio je zadužen za provjeru informacija o usklađenosti prijedloga zakona s *acquis*-em, koje su se nalazile u izjavi o usklađenosti i tabeli usklađenosti.

Sektor za analize i obrazovanje obavljao je zadatke pripreme parlamentarnih i zakonodavnih istraživanja proaktivno i na zahtjev zastupnika iz glavnih oblasti javnih politika, uključujući evropske integracije, te pružanja savjetodavnih usluga i obuka u vidu seminara i konferencija. Ovaj sektor je, na primjer, obrađivao i analizirao informacije u vezi s aktivnostima EU, Vijeća Evrope, NATO-a i drugih međunarodnih organizacija. Sektor je pripremao potrebne

dokumente za sastanke na zahtjev organa i radnih tijela Parlamenta, a posebno delegacija Parlamenta u navedenim institucijama. Također, za potrebe Parlamenta i zastupnika ovaj Sektor je redovno objavljivao analize aktualnih pitanja u obliku izdanja "Informativni materijali", "Monitor" i "Informacije o Slovačkoj i aktivnostima Parlamenta Slovačke". Osim toga, Sektor je surađivao i s parlamentarnim komisijama i *ad hoc* tijelima, pripremajući potrebne materijale, npr. za rasprave o određenim prijedlozima zakona. U vezi s posjetama iz inostranstva i obrnuto surađivao je sa Sektorom za vanjske odnose i protokol.

U 2000. godini Sektor za analize i obrazovanje imao je jednog rukovodioca, dva pomoćnika i 11 istraživača u dva odjela, među kojima je, u Odjelu za unutrašnju i vanjsku politiku i evropske integracije bio jedan stručnjak za odbrambenu i sigurnosnu politiku, jedan za ljudska prava, obrazovanje, nauku, žene i mlade, jedan za upravu, dva za usporedbu pravnih normi i jedan za historijske aspekte vanjske i unutrašnje politike.

Kao primjer, opis poslova istraživača u ovom odjelu koji se bavio usporedbom pravnih normi sadržavao je između ostalog sljedeće zadatke:

- priprema dokumenata potrebnih za zakonodavne i nadzorne aktivnosti Parlamenta i za imenovanja, a u vezi sa zakonodavnim procesom, teoretskim i praktičnim aspektima usklađivanja propisa, Nacionalnim programom usvajanja *acquis*,
- priprema dokumenata za rukovodioce Parlamenta, parlamentarne komisije, zastupnike i rukovodioca Sekretarijata u navedenim oblastima.

Odjel za razvojnu pomoć obavljao je sljedeće zadatke:

- upravljanje aktivnostima programa pomoći PHARE i pomoći drugih razvojnih fondova dodijeljene za aktivnosti Parlamenta i Sekretarijata,
- priprema koncepata, projekata, stručnih mišljenja i drugih materijala u oblasti razvojne pomoći parlamentu,
- redovna saradnja s organima državne uprave, naučno-istraživačkim i stručnim institucijama, organizacijama i udruženjima u Slovačkoj i inozemstvu u svrhu prikupljanja relevantnih informacija o sredstvima programa PHARE,
- saradnja sa Sektorom za analize i obrazovanje i Sektorom za kadrove na pripremi i organizaciji obrazovnih aktivnosti u okviru programa PHARE.

Sektor za parlamentarnu biblioteku uspostavio je čitaonicu za pravna pitanja i pitanja EU, a prilikom nabavke fonda vodio je računa i o procesu evropskih integracija.

Nakon prijema u članstvo u Evropskoj uniji Pravilnik o organizaciji Sekretarijata izmijenjen je radi uspostavljanja Sektora za evropske poslove, a Sektor za zakonodavstvo i usklađivanje propisa postao je poseban sektor izvan Parlamentarnog instituta.

Češka Republika

Amandmanom na Ustav Češke Republike iz 2001. godine propisano je, između ostalog, da Vlada redovno i unaprijed informira Parlament o pitanjima u vezi s EU, a propisane su i nadležnosti domova Parlamenta da daju mišljenje na pripremljene odluke u vezi s EU.

U Predstavničkom domu Parlamenta Češke Republike 1998. godine uspostavljena je **Komisija za evropske integracije** kao jedno od stalnih radnih tijela. Jedna od glavnih aktivnosti ove komisije bila je ocjena usklađenosti prijedloga zakona koje je podnosila Vlada sa *acquis*-em EU. Od maja 2000. godine, prema odluci Vlade, sva ministarstva koja su pripremala nacrt

propisa u okviru procesa pristupanja Evropskoj uniji morala su dostaviti taj nacrt Komisiji za evropske integracije radi preliminarnih konsultacija, koje su se održavale prije dostavljanja tog nacrta na sjednicu Vlade radi usvajanja, u vidu prijedloga zakona. Na taj način Komisija za evropske integracije bila je uključena i u pretparlamentarnu fazu zakonodavnog postupka. Konsultativno mišljenje komisije sastojalo se od sadržajne i formalne ocjene usklađenosti nacrta zakona sa zakonodavstvom EU. Mišljenje su potpisivali predsjedavajući Komisije i imenovani izvjestilac. Ako bi se tokom preliminarnih konsultacija utvrdila određena neusklađenost sa zakonodavstvom EU, održavane su neformalne usmene konsultacije s relevantnim ministarstvom, kako bi se uzele u obzir primjedbe Komisije ili kako bi se razjasnio tekst nacrta zakona.

Komisija za evropske integracije također je obavljala sistemski nadzor nad procesom pristupanja Evropskoj uniji. Redovno je razmatrala izvještaje Evropske komisije i Vlade u vezi s procesom pristupanja. Ministar vanjskih poslova i državni sekretar za evropska pitanja redovno su učestvovali na sjednicama Komisije i informirali članove o svim značajnim aspektima procesa pristupanja, na primjer o analitičkom pregledu (*screening*) zakonodavstva, zatvaranju određenih poglavlja ili izvještajima Evropske komisije. Na sjednice komisije također je redovno pozivan šef Delegacije EU u Pragu.

Osim toga, Komisija je pratila rad radnih tijela Vlade zaduženih za proces evropskih integracija: Vladine Komisije za evropske integracije i Komisije za provođenje Sporazuma o pridruživanju s EU, koje su se bavile provođenjem Sporazuma o pridruživanju i pripremom za članstvo u EU, a bile su značajan partner Parlamentu u okviru saradnje u vezi s pitanjima evropskih integracija. Komisija za evropske integracije obavljala je i određenu vrstu finansijske kontrole u vezi s prijedlozima zakona o budžetu i ekonomskim i socijalnim aspektom programa PHARE.

Osim prethodno navedenog, formiran je **Mješoviti parlamentarni odbor između EU i Češke Republike**. Također, predsjedavajući Komisije za vanjske poslove i Komisije za evropske integracije učestvovali su na redovnim sastancima predsjedavajućih ovih komisija iz država kandidatkinja i država članica EU. Oba doma Parlamenta i relevantne komisije organizirali su javne rasprave i dijalog s građanima o pitanjima u vezi s evropskim integracijama.

Prema Poslovniku Predstavničkog doma Parlamenta Češke Republike, **Sekretarijat Predstavničkog doma** pruža stručnu profesionalnu, organizacijsku i tehničku podršku radu Doma. Stručna podrška predstavlja sposobnost davanja stručnih informacija potrebnih za donošenje političkih odluka na nivou plenarne sjednice i sjednica komisija, a što omogućava nezavisnost odlučivanja Parlamenta o Vladi i pomaže obavljanju kontrole rada Vlade. Organizacijska podrška predstavlja sposobnost organiziranja svakodnevnog rada Predstavničkog doma i njegovih organa, a u **organizacijsku podršku** spadaju i **sekretarijati komisija** Doma. U Češkoj Republici ovi sekretarijati nemaju brojno osoblje i ne predstavljaju stručna tijela za davanje stručnih mišljenja, osim u Komisiji za budžet, koja ima odbor savjetnika. Tehnička podrška predstavlja sposobnost pružanja tehničkih usluga u svrhu obavljanja aktivnosti Doma (npr. IT, računovodstvo itd.).

Sekretarijat Komisije za evropske integracije činila su dva službenika, zatim tri, a kasnije pet službenika. Osoblje je izabrano između zaposlenih u Sekretarijatu Doma, i to iz Sektora za vanjske odnose, jer je najznačajniji faktor za izbor bio poznavanje engleskog i francuskog jezika.

Zastupnici su zatražili obuku o pravu EU, institucionalnoj strukturi EU, odlučivanju i zakonodavnom procesu, te je osnovan **Centar za pravo EU u Parlamentarnom institutu**, koji je postao centar širenja znanja o EU u Predstavničkom domu.

Kako bi zastupnici bili redovno informirani o obavezama koje proizlaze iz *acquis* EU, Sekretarijat Predstavničkog doma počeo je obavljati provjeru usklađenosti zastupničkih amandmana i prijedloga zakona sa zakonodavstvom EU, što je obavljao Parlamentarni institut. Nakon što bi relevantno ministarstvo dostavilo Domu nacrt propisa koji se usklađuje s *acquis*-em, Komisija za evropske integracije imenovala bi svog člana kao izvjestioca, koji bi, uz stručnjake iz Predstavničkog doma, razmatrao nacrt s predstavnicima ministarstva, nakon čega bi Komisija za evropske integracije dostavila pisano mišljenje Vladi prije razmatranja nacrta na sjednici Vlade.

Latvija

U Parlamentu Latvije 1995. godine uspostavljena je **Komisija za evropske poslove** u svrhu usklađivanja zakonodavstva s *acquis*-em. Tokom procesa pristupanja EU na sjednicama ove komisije razmatrani su pregovarački stavovi Latvije. Također, u to vrijeme, osoblje ove komisije prisustvovalo je sjednicama svih ostalih stalnih radnih tijela Parlamenta (za što je Komisija tada imala dovoljan broj osoblja), kako bi vodili računa o tome da zakoni koji će se usvojiti ne sadrže odredbe koje nisu u skladu sa zakonodavstvom EU. U situacijama kad bi se utvrdilo da postoje takve odredbe, Komisija za evropske poslove imala je na raspolaganju načine da ukloni neusklađenosti:

1. Komisija bi ukazala na neusklađenosti, a imala je i međunarodne stručnjake, koji bi pred nadležnom komisijom objasnili potencijalne neusklađenosti,
2. Komisija bi istovremeno komunicirala s Vladom i po potrebi tražila postupanje Vlade,
3. ako je bilo potrebno, Komisija je organizirala predavanja za nadležnu komisiju u vidu seminara u Latviji s učešćem stranih stručnjaka ili, ako je to bilo neophodno, odlaskom nadležne komisije u Brisel kako bi zastupnici dobili dovoljno informacija.

Bile su desetine ili stotine slučajeva kad su korištena prva dva načina, a samo nekoliko situacija kada je sama Komisija za evropske integracije morala intervenirati.

Značajan je bio i rad Komisije za evropske poslove na međunarodnom planu, na nivou Baltičkih država i Evrope, kao i saradnja Komisije s Uredom predsjednika Vlade za evropske integracije, koji je Parlamentu dostavljao pregled pitanja i postignutog napretka iz nadležnosti svakog ministarstva, a Komisija je redovno pozivala resorne ministre da bi dobila informacije o napretku.

U Parlamentu Latvije 1997. godine otvoren je **Informativni centar o Evropskoj uniji**, čiji je najvažniji zadatak bio informiranje zastupnika, dostavljanje potrebnih dokumenata zastupnicima, kao i dostavljanje, svakog četvrtka, sažete informacije o najvažnijim događajima tokom sedmice. Centar je također informirao službenike Parlamenta, a vremenom je, u nekoliko faza, postao otvoren za građane. U početku je radio s novinarima, pripremajući odgovore na njihova pitanja o EU, a zatim je otvoren za sve građane. Centar je sedmično objavljivao "Evropske novosti", a posebno je intenzivirao rad u periodu prije referenduma o pristupanju EU radi educiranja i što boljeg informiranja građana. U formiranje Informativnog centra uloženo je puno rada, a osoblje, koje su činili bivši novinari i stručnjaci drugih specijalnosti, obučavano je nekoliko godina. Između ostalog, organizirane su brojne

informativne kampanje u saradnji s novinama, s ciljem da im se pomogne u pripremi što kvalitetnijih i tačnih informacija o EU. Ovo iskustvo je kasnije preneseno Parlamentu Gruzije.

*Tokom procesa pristupanja EU u Parlamentu **Rumunije** je pored Komisije za evropske integracije i Sekretarijata te komisije djelovao i Sektor za evropska pitanja, a u Parlamentu **Litvanije** Evropski informativni centar je bio u sastavu Sekretarijata Komisije za evropska pitanja, dok je u parlamentima **Estonije**, **Hrvatske** i **Slovenije** djelovala komisija za evropske integracije i njen sekretarijat, a nije bila formirana organizaciona jedinica sektor za evropske integracije.*

U Parlamentu **Rumunije** Komisija za evropske integracije osnovana je 1995. godine, a bila je nadležna za: praćenje provođenja Sporazuma o pridruživanju i Državne strategije pristupanja EU, učešće u Mješovitom parlamentarnom odboru Rumunija-EU, praćenje usklađivanja propisa s *acquis*-em EU, podnošenje izvještaja Parlamentu. U tom periodu djelovao je **Sektor za evropska pitanja**, a neke od njegovih nadležnosti bile su: priprema materijala za obavljanje nadzora, praćenje usklađivanja propisa s *acquis*-em EU, koordiniranje kontakata između Parlamenta i institucija EU. Prema informacijama kolega, opis poslova ovog sektora i tekst tadašnjeg Pravilnika o organizaciji Sekretarijata Parlamenta nalaze se u zatvorenom digitalnom arhivu i dostupni su samo na rumunskom jeziku.

U Parlamentu **Litvanije** 1997. godine formirana je Komisija za evropska pitanja, kao glavno parlamentarno tijelo u periodu pregovaranja o članstvu u EU. U tom periodu ova Komisija je, prema tadašnjem članu 61. Poslovnika Parlamenta, imala sljedeće nadležnosti:

- razmatranje najznačajnijih pitanja iz nadležnosti Parlamenta u vezi s politikama prema Evropskoj uniji i donošenje zaključaka o tim pitanjima,
- koordiniranje aktivnosti komisija Parlamenta na pitanjima integracije u Evropsku uniju,
- razmatranje pretpristupne strategije, provođenja programa usklađivanja zakonodavstva Litvanije sa zakonodavstvom EU, odluka Vlade o pitanjima pretpristupnih pregovora i drugih pitanja evropskih integracija,
- provođenje parlamentarne kontrole nad državnim institucijama tokom priprema za pregovore i pregovora o članstvu u EU,
- doprinos demokratskom odvijanju procesa integracije u EU.

Tadašnji **Sekretarijat** ove komisije činili su: viši savjetnik (rukovodilac Sekretarijata), savjetnici, saradnici i administrativni sekretar. Osim toga, od jula 2002. godine u okviru Sekretarijata Komisije djelovao je **Evropski informativni centar**, koji su činili jedan savjetnik i jedan saradnik. Također, u februaru 2003. broj službenika ovog sekretarijata bio je povećan. Opis poslova navedenih službenika dostupan je samo na litvanskom jeziku u formatu pdf.

U Parlamentu **Estonije** tokom pristupnog procesa posebno je bila značajna **Komisija za evropska pitanja**, formirana 1997. godine, čiji su zadaci bili praćenje djelovanja Vlade u pretpristupnom periodu i tokom pregovora o pristupanju, saradnja s Evropskim parlamentom, predstavljanje Parlamenta u Mješovitom parlamentarnom odboru Estonija – EP, ostvarivanje kontakta s drugim institucijama EU, informiranje Parlamenta o održanim sastancima, informiranje javnosti o evropskim integracijama, razmatranje izvještaja Vlade o procesu evropskih integracija i davanje preporuka, razmatranje strategije pregovaranja o članstvu u EU, redovni sastanci s premijerom, predstavnicima radnih grupa Vlade i predstavnicima nevladinih organizacija, podnošenje izvještaja Parlamentu, ocjena i potvrđivanje pregovaračkih stavova Estonije prije dostavljanja EU.

U procesu pristupanja **Hrvatske** EU učestvovala su stalna radna tijela Hrvatskog sabora, uključujući **Odbor za evropske integracije**, koji je pratio usklađivanje propisa s *acquis*-em EU, provođenje obaveza po međunarodnim ugovorima u okviru Vijeća Evrope i provođenje programa pomoći EU. Službenici koji su obavljali poslove za ovaj odbor bili su rukovodilac Sekretarijata Odbora, jedan savjetnik i jedan administrativni sekretar. Osim toga, u Saboru su djelovali *Nacionalni odbor za praćenje pregovora o pristupanju*, koji je također imao sekretara, jednog savjetnika i jednog administrativnog sekretara, te *Mješoviti parlamentarni odbor Hrvatska-EU*, koji nije imao svoje osoblje.

Parlament **Slovenije** tokom procesa pregovaranja o članstvu imao je dva glavna zadatka: usklađivanje propisa s *acquis* EU i potvrđivanje predloženih pregovaračkih stavova Slovenije. U tom periodu djelovala je **Komisija za evropska pitanja**, sa sljedećim nadležnostima:

- razmatranje općih pitanja evropskih integracija,
- analiza posljedica uključivanja Slovenije u evropske integracije,
- koordiniranje rada matičnih radnih tijela po pitanjima evropskih integracija, davanje mišljenja i preporuka,
- organiziranje predavljanja mišljenja javnosti o značajnim pitanjima evropskih integracija,
- razmatranje programa uključivanja u EU i praćenje njegovog provođenja,
- saradnja s institucijama u Sloveniji, drugim državama i organima EU na pitanjima evropskih integracija,
- praćenje usklađivanja propisa s *acquis*-em EU.

Izvori informacija:

Odgovori na upit ECPRD 4682 od 12.3.2021.